

Julie James AS

Y Gweinidog Tai a Llywodraeth Leol

26 Hydref 2020

Annwyl Julie,

Diolch am eich llythyr, dyddiedig 15 Hydref 2020, yn ymwneud â'r Cytundeb Amlinellol Fframwaith drafft ar gyfer Cynllunio o ran Sylweddau Peryglus.

Ar hyn o bryd, o ran fframweithiau cyffredin y disgwylir iddynt gael eu cyhoeddi cyn diwedd 2020, gallu cyfyngedig sydd gan y Pwyllgor i graffu ar y rhai sy'n dod o fewn ei gylch gwaith. Nid ydym yn rhagweld gwneud gwaith sylweddol ar y darpar Gytundeb Amlinellol Fframwaith ar gyfer Cynllunio o ran Sylweddau Peryglus, ond byddai'n dda cael ymateb gennych ar yr isod:

Datblygu'r fframwaith cyffredin

- 1. A allwch chi egluro pam, yn eich barn chi, y mae angen fframwaith yn y maes polisi hwn?**
- 2. A allwch ehangu ar pam y dewisodd gweinyddiaethau'r DU ddilyn fframwaith anneddfwriaethol?**
- 3. A allwch chi amlinellu sut rydych chi wedi ymgysylltu â rhanddeiliaid Cymru, gan gynnwys diwydiant, awdurdodau cynllunio lleol a Chyfoeth Naturiol Cymru, wrth ddatblygu'r fframwaith?**
- 4. A allwch chi amlinellu'r materion allweddol a godwyd gan rhanddeiliaid Cymru a sut mae'r rhain wedi cael eu hadlewyrchu yn y fframwaith?**

Rhyngweithio â chyfraith ddomestig, cyfraith ryngwladol a chytundebau rhyngwladol

- 5. A allwch egluro a yw'r fframwaith yn rhyngweithio â deddfwriaeth ddomestig bresennol, ar wahân i'r hyn sydd eisoes wedi'i restru yn Adran 1 o'r Cytundeb Amlinellol Fframwaith drafft?**



Senedd Cymru

Bae Caerdydd, Caerdydd, CF99 1SN

 SeneddNHAMG@senedd.cymru

 0300 200 6565

Welsh Parliament

Cardiff Bay, Cardiff, CF99 1SN

 SeneddCCERA@senedd.wales

 0300 200 6565

6. Mae'r DU yn llofnodwr i ddau gytundeb rhyngwladol sy'n berthnasol i'r gyfundrefn ar gyfer sylweddau peryglus: Confensiwn Aarhus a Chonfensiwn Effeithiau Trawsffiniol Damweiniau Diwydiannol. **A allwch chi ehangu ar sut y bydd y fframwaith yn sicrhau y cydymffurfir â'r Confensiynau hyn?**

7. A allwch egluro a fydd canlyniad y trafodaethau parhaus rhwng yr UE a'r DU ar y Berthynas yn y Dyfodol yn effeithio ar y fframwaith, ac os felly, sut?

8. A allwch egluro a fydd Bil Marchnad Fewnol Llywodraeth y DU yn effeithio ar y fframwaith, ac os felly, sut?

Proses graffu ac amserlenni

9. A allwch gadarnhau y bydd y fframwaith yn cynnwys y Cytundeb Amlinellol Fframwaith dros dro, y Concordat a'r Memorandwm Cyd-ddealltwriaeth wedi'i ddiweddarau y cyfeirir atynt yn y Cytundeb Amlinellol Fframwaith drafft?

10. A allwch egluro a fydd y Concordat a'r Memorandwm Cyd-ddealltwriaeth wedi'i ddiweddarau ar gael i'r Senedd graffu arnynt?

11. A allwch egluro'r amserlen ar gyfer gwaith craffu'r Senedd ar y Cytundeb Amlinellol Fframwaith dros dro a'r dogfennau cysylltiedig?

Trefniadau monitro ac adolygu ar gyfer y fframwaith

Yn ôl y Cytundeb Amlinellol Fframwaith drafft, nid oes unrhyw fesurau monitro ffurfiol yn gysylltiedig â'r fframwaith. Yn lle hynny, bydd arweinwyr polisi ym mhob gweinyddiaeth yn cynnal cynadleddau ffôn bob chwe mis "to discuss any issues and share learning". Yn ogystal, fe gynhelir cyfarfod adolygu rhwng gweinyddiaethau'r DU ddwy flynedd ar ôl i'r fframwaith ddod i rym.

12. A allwch chi egluro pam mae gweinyddiaethau'r DU wedi dewis peidio â sefydlu system fwy ffurfiol ar gyfer monitro'r gwaith o weithredu'r fframwaith?

13. A allwch egluro a fydd adroddiad o'r cyfarfod adolygu cyd-rhwng gweinyddiaethau'r DU ar gael i'r cyhoedd?

Mae'r Cytundeb Amlinellol Fframwaith drafft yn nodi y byddai cyfranogiad rhanddeiliaid yn y broses adolygu a diwygio ar gyfer y fframwaith yn cael ei ystyried ar y pryd.

14. A allwch chi egluro o dan ba amgylchiadau y byddai'n amhriodol cynnwys rhanddeiliaid yn y broses adolygu ar gyfer y fframwaith?

15. A allwch chi gadarnhau a fydd y Senedd yn gallu cyfrannu i'r gwaith o adolygu a diwygio'r fframwaith, ac os felly, sut?



Cefndir y fframwaith cyffredin

16. A allwch chi amlinellu 'gofynion sylfaenol' Cyfarwyddeb Seveso III mewn perthynas â chynllunio o ran sylweddau peryglus, sy'n gyffredin ledled y DU?

Yn ôl y Cytundeb Amlinellol Fframwaith drafft, mae cryn le ar gyfer gwahaniaeth yn barod o dan y gyfundrefn gynllunio gyfredol o ran sylweddau peryglus. Fodd bynnag, mae nifer o gyfyngiadau ar yr hyn y gall gweinyddiaethau'r DU ei ddiwygio, yn seiliedig ar yr hyn a osodwyd ar lefel yr UE. Mae'r cyfyngiadau allweddol yn cynnwys newid y diffiniad o sefydliad a gostwng safonau ynghylch beth yw sylwedd peryglus.

17. A allwch chi ddarparu mwy o fanylion am faint o gyfle sydd ar gyfer gwahaniaeth o dan y gyfundrefn gynllunio gyfredol o ran sylweddau peryglus?

Y gyfundrefn gynllunio ar gyfer sylweddau peryglus wedi Ymadael â'r UE

18. A allwch egluro a fydd unrhyw un neu rai o'r 'cyfyngiadau allweddol' cyfredol yn cael eu cynnal ledled y DU yn y cyfnod wedi ymadael â'r UE? Sut y bydd hyn yn cael ei adlewyrchu yn y fframwaith?

O dan y gyfundrefn gynllunio gyfredol ar gyfer sylweddau peryglus, mae gofynion sylfaenol cyffredin ledled y DU. Efallai nad felly y bydd hi o reidrwydd o dan y gyfundrefn wedi ymadael â'r UE, gan y bydd gan weinyddiaethau'r DU gwmpas ehangach i ddefnyddio'u pwerau i wneud newidiadau. Gallai'r newidiadau hyn gynnwys llacio gofynion ynghylch lefel y sylweddau y gellir eu dal cyn cychwyn y broses gydsynio, ac o bosibl (mewn senario lle na fyddai'r egwyddor dim atchwelyd yn berthnasol) gael gwared ar reolaethau ar gyfer rhai sylweddau yn llwyr.

19. Pa ystyriaeth a roddwyd i gynnal gofynion sylfaenol cyffredin, gan gynnwys, er enghraifft, safonau gofynnol ar gyfer beth yw sylwedd peryglus?

20. Beth yw'r risgiau a'r cyfleoedd posibl yn gysylltiedig â pheidio â chynnal gofynion sylfaenol cyffredin ac ehangu'r cyfle ar gyfer gwiriadau?

21. I ba raddau yr ydych chi'n fodlon na fydd y dull a ddewiswyd ar gyfer y maes polisi hwn, h.y. fframwaith anneddfwriaethol, yn arwain at safonau is a gostyngiad yn lefelau'r amddiffyniad ar gyfer iechyd pobl a'r amgylchedd?

22. I ba raddau mae'r fframwaith yn cyd-fynd ag ymrwymiad Llywodraeth Cymru i ddim atchwelyd o ran safonau amgylcheddol?

Cynigion ar gyfer newidiadau i'r gyfundrefn gynllunio ar gyfer sylweddau peryglus yn y dyfodol

Wrth ymateb i'r [Ymgynghoriad ar drosi gofynion cynllunio defnydd tir Cyfarwyddeb Seveso III ar reoli peryglon damweiniau mawr](#) (Awst 2015), nododd Llywodraeth Cymru y byddai'n ystyried diwygio'r gyfundrefn yn ddiweddarach.

23. A allwch egluro a yw Llywodraeth Cymru wedi gwneud unrhyw waith ar gynigion i ddiwygio'r gyfundrefn gynllunio ar gyfer sylweddau peryglus ers yr ymgynghoriad uchod?



24. A allwch egluro a oes gan Lywodraeth Cymru unrhyw gynlluniau nawr neu yn y dyfodol i adolygu'r gyfundrefn gynllunio ar gyfer sylweddau peryglus?

25. O dan ba amgylchiadau y byddai Llywodraeth Cymru yn ystyried cynigion i ostwng rheolaethau yn is na'r gofynion sylfaenol cyfredol, er enghraifft, ynghylch lefel y sylweddau y gellir eu dal, neu mewn perthynas â'r broses gydsynio?

26. A allwch egluro a fyddai newidiadau i'r gofynion sylfaenol cyfredol yn destun ymgynghoriad cyhoeddus ac yn amodol ar gymeradwyaeth y Senedd?

27. I ba raddau yr ydych chi'n fodlon bod digon o arbenigedd technegol ar lefel Cymru neu'r DU i gymryd lle'r hyn sydd ar gael ar lefel UE ar hyn o bryd yn y maes polisi hwn?

28. Yn absenoldeb gofynion newydd neu ddiwygiedig yr UE mewn perthynas â chynllunio o ran sylweddau peryglus sy'n gymwys i'r DU, pa drefniadau a roddir ar waith i adolygu gofynion domestig, gan ystyried datblygiadau mewn mannau eraill?

Byddwn yn ddiolchgar pe gallech ymateb i'r cwestiynau uchod cyn gynted â phosibl, ac erbyn 13 Tachwedd 2020 fan bellaf.

Rwy'n anfon copi o'r llythyr hwn at Gadeirydd y Pwyllgor Deddfwriaeth, Cyfiawnder a'r Cyfansoddiad, a Chadeirydd Y Pwyllgor Materion Allanol a Deddfwriaeth Ychwanegol.

Yn gywir,



Mike Hedges AS

Cadeirydd y Pwyllgor Newid Hinsawdd, Amgylchedd a Materion Gwledig

Croesewir gohebiaeth yn Gymraeg neu Saesneg.

We welcome correspondence in Welsh or English.

